

Հայոց 1114 թուականից (1665 թուին) Նոր-
 Զուղայի բնակիչների թիւն յայտնում է 12.000
 տուն կամ մօտ 150.000 բնակիչ, բայց այդ
 թիւն, ի հարկէ, միայն Նոր-Զուղային չէ վե-
 րաբերում, այլ Սպահանում ու նրա մօտակա-
 քում գտնուած բոլոր Հայերին. անկարելի է, որ
 միայն Նոր-Զուղայում այդքան բնակիչներ լի-
 նէին, որովհետեւ Շարդէնը, որ նկարագրել է
 Նոր-Զուղան գրեթէ նոյն ժամանակ (1665ին),
 ասում է, որ գաղթականութիւնից 6 տարի յետ-
 ոյց (1611ին) բնակիչների թիւն հասաւ 5000ի:
 Ուրեմն, եթէ 50—55 տարւայ ընթացքում
 բնակիչների թիւն դարձել է 12.000 տուն,
 պարզ է, որ դրա մէջ հաշւում են եւ Սպա-
 հանի ու շրջակայ գիւղերի Հայերին: Մենք գի-
 տենք եւրոպացի ուրիշ պատմագիրներից, որ
 Նոր-Զուղան իր ամենածաղկած դրութեան ժա-
 մանակ 12.000 հօգի բնակիչ է ունեցել: Միւս
 կողմից մենք գիտենք, որ գաղթականների կէսն
 հաղիւ հասաւ Պարսկաստան. այդ մասին բացի
 զանազան ստոյգ տեղեկութիւններից ունենք
 եւ մի ժամանակակից ձեռագիր յիշատակարան՝
 Նոր-Զուղայի Ս. Մինաս եկեղեցում:

“Եւ եթէ զմտաւ ածենք՝ քան զկէսն մա-
 հուանէ ի կեանս փոխեցան առ Աստուած, ոմանք
 Զրախեղդ մեռան՝ ոմանք ի ցրտոյ պակասեցան եւ
 ոմանք ազգի ազգի մահուամբ առ Քրիստոս փո-
 խեցան”¹:

¹ Պատմ. Նոր-Զուղայու Յ. Թ. Տէր-Յովհաննան,
 Նոր-Զուղա, 1880թ.